

दिनांक 18.11.2025

समय: 18.45 बजे

- प्रधानमंत्री नरेन्द्र मोदी रो काल पीएम किसान सम्मान निधि री 21वीं किस्त जारी करण रो कार्यक्रम-प्रदेश रा किसानां रा खातां मांय ई 1 हजार 332 करोड़ रुपया ऊँ बत्ती रकम भेजी जावेलां
- राष्ट्रपति द्रौपदी मुर्मू छठा राष्ट्रीय जल पुरस्कार दीना-राजस्थान रा चार जिला ई नवाजी ज्यां
- केन्द्रीय सांख्यिकी मंत्री राव इन्द्रजीत सिंह कह्यो-रियल टाईम डेटा निगराणी अर जिओ टैगिंग सरीखा डिजिटल साधनां ऊँ सर्वे री प्रक्रिया व्यवस्थित बणीं
- देश रा न्यारा-न्यारा हलका मांय चाल रह्या मतदाता सूची एसआईआर कार्यक्रम रा दूजा दौर मांय हाल ताई 50 करोड़ 97 लाख मतदातावां ताई गणना प्रपत्र पूगायी ज्यीं

000

प्रधानमंत्री नरेन्द्र मोदी रो काल पीएम किसान सम्मान निधि री 21वीं किस्त री रकम जारी करण रो कार्यक्रम हैं वे तमिलनाडू रा कोयम्बटूर मांय राख्या जावण वाळा कार्यक्रम रे दौरान देशभर रा 9 करोड़ किसानां रा बैंक खातां मांय 18 हजार करोड़ रुपया भेजेलां ई रा तैत राज्य रा 66 लाख 62 हजार किसानां ने ई 1 हजार 332 करोड़ रुपया ऊँ बत्ती रकम मिलेलां सहकारिता राज्य मंत्री गौतम कुमार दक बतायो के हर किसान रा खाता मांय दो हजार रुपया भेज्या जावेलां ध्यानजोग है के पीएम किसान सम्मान निधि रा तैत पात्र किसानां ने हर साल 6 हजार रुपया री रकम तीन बराबर किस्तां मांय दी जावे हैं हाल ताई ई योजना रा तैत 20 किस्तां रे जरिये 3 लाख 91 हजार करोड़ रुपया किसानां ने दिया जा चुक्या हैं प्रदेश मांय ई काल 66 लाख 62 हजार किसानां रा बैंक खातां मांय 1 हजार 332 करोड़ रुपया री रकम सीधी भेजी जावेलां राज्य स्तर रो जळसो जयपुर रा कृषि प्रबंध संस्थान मांय राख्यो जावेला, जिण मांय मुख्यमंत्री भजनलाल शर्मा ई शामिल व्हेलां ई योजना री सरुआत ऊँ हाल ताई प्रदेश रा किसानां ने 25 हजार 142 करोड़ रुपया दिया जा चुक्या हैं प्रदेश मांय किसानां ने और फायदो देवण सारु मुख्यमंत्री किसान सम्मान निधि योजना ई चलायी जा रही हैं ई रा तैत पीएम किसान सम्मान निधि रा पात्र सगळा काश्तकारां ने हर साल 3 हजार रुपया और दिया जावे हैं

000

राष्ट्रपति द्रौपदी मुर्मू पाणी री उपलब्धता अर हिफाजत तैय करण सारु सगळा ऊँ मिल र काम करण बाबत् कह्यो हैं वे आज नई दिल्ली मांय राष्ट्रीय जल पुरस्कार 2024 अर पहला जल संचय जन भागीदारी पुरस्कार देवण रे मौके बोल रही हीं वे कह्यो के आब-ओ-हवा मांय बदलाव जल चक्र माथे असर कर रह्यो हैं राष्ट्रपति कह्यो के पाणी ने बुद्धिमानी सागे काम लेवणो घणो जरूरी हैं

.....

कार्यक्रम मांय प्रदेश रा बाड़मेर, भीलवाड़ा, डूंगरपुर अर चित्तौड़गढ़ जिलां रो ई मान करी ज्यों बाड़मेर री जिला कलेक्टर टीना डाबी ने राष्ट्रपति ओ मान दे र नवाजीं भीलवाड़ा रा जिला कलेक्टर जसमीत सिंह संधु ने ई राष्ट्रपति नवाजां

.....

म्हाणा भीलवाड़ा खबरनवीस बतायो के जल संचय-जन भागीदारी अभियान रा तैत वठे ज़मीं हटे पाणी रा लेवल मांय चोखी बधोतरी व्ही हैं

.....

डूंगरपुर रा जिला कलेक्टर अंकित कुमार सिंह ने ई ओ ईनाम दे र नवाजी ज्यां जिला ने पाणी भेळो करण रा 9 हजार 712 काम पूरा करण सारु 25 लाख रुपया दिया ज्यां ई हलका मांय चोखो काम करण सारु चित्तौड़गढ़ रा जिला कलेक्टर आलोक रंजन रो ई मान करी ज्यों ध्यानजोग है के देश मांय पाणी बचावण रा काम मांय जनता री भागीदारी बधावण सारु लारला साल सरु करी ज्या जल संरक्षण जनभागीदारी अभियान रा तैत ज़मीं हटे पाणी रो लेवल बधावण सारु 35 लाख ऊँ बत्ती संरचनावां बणायी ज्यीं हैं

000

भारतीय भूवैज्ञानिक सर्वेक्षण-जीएसआई कानी ऊँ गुरुवार ऊँ जयपुर मांय अतीत का पता लगाना, भविष्य को आकार देना मुद्दा माथे दो दिन रो अंतर्राष्ट्रीय सेमिनार राख्यो जावेलां केंद्रीय कोयला अर

खान मंत्री जी. किशन रेड्डी रो इण रो उद्घाटन करण रो कार्यक्रम हैं सेमीनार मांय देश-परदेश रा भूवैज्ञानिक खनिजां री खोज, भूवैज्ञानिक खतरां अर नुवी तकनीकां रा बारा मांय विचार करेलां

000

10 दिसम्बर ने जयपुर मांय व्हेवण वाळा प्रवासी राजस्थानी दिवस कार्यक्रम रा सिलसिला मांय 27 नवम्बर ने पर्यटन प्री-समिट राख्खी जावेलां इण मांय राज्य ने सैर-सपाटा री ठौड़ रा तौर ऊँ विकसित करण री रणनीति रा बारा मांय विचार कर्यो जावेलां समिट मांय मुख्यमंत्री भजनलाल शर्मा अर उपमुख्यमंत्री दियाकुमारी रो ई शामिल व्हेवण रो कार्यक्रम हैं

000

केंद्रीय सांख्यिकी मंत्री राव इन्द्रजीत सिंह कह्यो है रियल टाईम डेटा निगरानी अर जिओ टैगिंग सरीखा डिजिटल साधनां ऊँ सर्वे रो काम व्यवस्थित व्ह्यो हैं श्री सिंह आज उदयपुर मांय राष्ट्रीय प्रतिदर्श सर्वेक्षण-एनएसएस री 75वीं वर्षगांठ रा समापन समारोह मांय बोल रह्या हां वे कह्यो के इण ऊँ डेटा री सटीकता मांय सुधार व्ह्यो हैं कार्यक्रम रा पैनल डिस्कशन सत्र मांय सरपंच, राजस्व विभाग रा गिरदावर अर स्थानीय कारोबारी शामिल व्ह्यां वे आप-आप रा हलका मांय सांख्यिकीय आंकड़ां रा उपयोग अर सर्वे रा महत्त्व सागे न्यारा-न्यारा मुद्दां माथे अनुभव बतायां

000

आज जयपुर रो स्थापना दिवस मणायो जा रह्यो हैं ई मौके न्यारा-न्यारा कार्यक्रम राख्खी ज्यां ई मौके देशी-परदेशी सैलाणी ई मोटी तादाद मांय जयपुर पूग्यां सैलाणी गुलाबी नगरी रा नियोजन री सराहवणा कीनीं

.....

जयपुर ढूंढाड़ परिषद री ओर ऊँ आज राख्खी ज्या जयपुर स्थापना दिवस कार्यक्रम मांय सोहवणी सांस्कृतिक प्रस्तुतियां पेश करी ज्यीं

000

वोटर लिस्टां रा विशेष गहन पुनरीक्षण कार्यक्रम रा दूजा दौर रा तैत देश मांय हाल ताई 50 करोड़ 97 लाख मतदातावां ताई गणना प्रपत्र पूगाया जा चुक्या हैं वोटर लिस्टां री मोटा पैमाना माथे जांच रो काम आवता साल 7 फरवरी ने वोटर लिस्टां री छपाई सागे पूरो व्हेलां राज्य मांय ई एसआईआर रा तैत आज पाली, करौली अर डीग जिला मांय शिविर लगायी ज्यां बारां रा जिला कलेक्टर रोहिताश्व सिंह तोमर खबरनवीसां ने बतायो के जिला मांय एसआईआर रा तैत हाल ताई 31 फीसदी फॉर्म डिजिटल बणा दिया ज्या हैं

.....

एसआईआर रा तैत गणना प्रपत्रां ने डिजिटल बणावण रा काम मांय राजस्थान अगाड़ी हैं चुनाव विभाग ऊँ मिली जाणकारी रे मुजब 1 करोड़ 65 लाख ऊँ बत्ता गणना प्रपत्र ईसीआई नेट माथे अपलोड कर दिया ज्या हैं फॉर्म भरण मांय मदद करण सारु पाली रा आदिवासी हलकां री स्कूलां मांय खास शिविर लगाया जा रह्या हैं

000

महिलावां अर बच्चां रे खिलाफ बधता अपराधां री रोकथाम माथे विचार करण सारु जयपुर री सेंट्रल डिटेक्टिव ट्रेनिंग इंस्टीट्यूट मांय राख्खी ज्यो राज्य स्तर रो सम्मेलन आज पूरो व्हे ग्यो सम्मेलन मांय पुलिस रा आला अहलकार, बाल संरक्षण कर्मचारी अर अभियोजन अहलकार शामिल व्ह्यां ई मौके ट्रेनिंग इंस्टीट्यूट रा निदेशक, आईपीएस डॉ. अमनदीप सिंह कपूर कह्यो के मिशन वात्सल्य, बाल संरक्षण तंत्र ने मजबूत बणावण वाळो असरदार राष्ट्रीय कार्यक्रम हैं

000

राजस्थान लोक सेवा आयोग-आरपीएससी राजस्थान राज्य अर अधीनस्थ सेवाएं भर्ती-2024 रा पहला दौर रा इन्टरव्यू री तारीख रो ऐलाण कर दीनो हैं इन्टरव्यू 1 ऊँ 12 दिसम्बर ताई लिया जावेलां इन्टरव्यू सारु जावण वाळा उम्मीदवारां ने विगतवार अर्जी री दो प्रतियां, सगळा मूल कागजात अर वां री फोटोकॉपी, नुवी रंगीन फोटो अर मूल फोटो पहचान पत्र ले जावणा व्हेलां

000

राष्ट्रीय प्राकृतिक चिकित्सा दिवस रे मौके आज प्रदेश मांय न्यारी-न्यारी ठौड़ां कार्यक्रम राख्खी ज्यां कोटा रा तलवंडी रा सरकारी आयुर्वेद, योग अर प्राकृतिक चिकित्सा एकीकृत महाविद्यालय मांय राख्खी ज्या जळसा रे दौरान विद्यार्थी सांस्कृतिक कार्यक्रम पेश कीना, योग डांस कीनो अर पिरामिड बणायां

कार्यक्रम रे दौरान प्राकृतिक चिकित्सा री जाणकारी देवण वाळी प्रदर्शनी ई लगाई ज्यीं सवाईमाधोपुर रा सरकारी योग अर प्राकृतिक चिकित्सा अनुसंधान केंद्र मांय ईलाज रो मुफ्त शिविर लगायी ज्यो

000

लौह पुरुष सरदार वल्लभ भाई पटेल री डोढ़ सौ वीं जयंती रा सिलसिला मांय राख्या जा रह्या कार्यक्रमं रा तैत आज भरतपुर ज़िला रा बयाना मांय 'रन फॉर यूनिटी' राख्यी ज्यीं जिला प्रशासन अर माय भारत री ओर ऊँ राख्यी ज्यी दौड़ मांय अहलकार, कर्मचारी, विद्यार्थी, एनसीसी कैडेट्स अर जनता हाथां मांय तिरंगा झण्डा ले र देशभक्ति रा नारा लगायां

000

प्रधानमंत्री नरेन्द्र मोदी 30 नवम्बर दीतवार ने आकाशवाणी ऊं प्रसारित कर्या जावण वाळा खास कार्यक्रम "मन की बात" मांय विचार बतावेलां आ हर महीना प्रसारित कर्या जावण वाळा ई कार्यक्रम री 128वीं कड़ी व्हेलां ई सारु राय 28 नवम्बर तांई मुफ्त नम्बर 1800—11—7800 माथे दी जा सके हैं नरेन्द्र मोदी एप अर माय जीओवी ओपन फोरम रे जरिये ई विचार दिया जा सके हैं

000